

præfens disputamus, quam ille, qui est de Mutilatione hujus Cœnæ Servatoris nostri. Atque hæc causa est, cur hunc potissimum errorem deligere & superioribus duobus de Sanctis adorandis atque Purgatorio, adjungere hoc loco voluerimus. Quemadmodum enim illis, se Deo superiorem esse velle, ostendit Anti-Christus, ita hoc æque manifeste significat, quod ea, quæ Deus fieri a nobis voluit, proptereaque præcepit, possit interdiceri, proque sua libidine iterum mutare, conjungere, & post, quando ita forte visum fuerit, rursus dilacerare, insuper habitis præceptis & Verbo Dei.

§. II. Inscribitur hic error alias de Mutilatione S. Cœnæ, alias de Communionem sub una specie, quod, quid sibi velit, ut intelligatur, rem ipsam breviter exponemus. Scilicet Christus Jesus Servator noster Testamento reliquit nobis, adeoque vel hac ratione serio voluit, atque etiamnum vult, ut verum corpus ac sanguinem illius sub specie gemina, hoc est, Sub, In & Cum pane atque vino consecratis omnes, quotquot in Ecclesia illius vivimus, & comedamus subinde & bibamus. Pontifex maximus e contrario, cum Conciliis suis, Decretis, & Canonibus, nulla addita ratione velut pro imperio, & quasi plus quam prætoriam auctoritatem præditus esset, præcipit & mandat, ut non omnes, sed Clerici tantum, & illi quidem conficientes, hoc est, quando Sacra (missam intelligo) faciunt, sumant utramque speciem, adeoque & panem comedant in Corpus Christi (liceat ita loqui cum Barbarizantibus) transubstantiatum, & vinum bibant in Sanguinem Christi iterum, nescio quomodo, transubstantiatum. Deinde vero Laicis (hominibus Sacra nunquam facientibus) & Clericis non conficientibus ita præcipit, nullam iterum reddita ratione, ut sibi falso persuadeant,